



REPUBLIKA E SHQIPËRISË

KUVENDI

Grupi Parlamentar i Partisë Demokratike ✓

Nr. 2800 Prot.

Tiranë, më 22 / 06 /2026

**Lënda:** Kërkesë për zhvillimin e një Mocioni me Debat

**Drejtuar:** **Z. Niko PELESHI**  
Kryetar i Kuvendit të Shqipërisë

**Baza Ligjore:** Neni 98 i Rregullores së Kuvendit

*I nderuar z. Kryetar i Kuvendit,*

Sikurse jeni në dijeni, prej datës 31 Maj 2026 e në vijim, në Shqipëri, qytetarë të paanagazhur politikisht, kanë thirrur protesta masive, që morën shkak nga mungesa e plotë e transparencës mbi një projekt zhvillimi në një zonë të mbrojtur. Prej ditësh tashmë masivisht qytetarët marrin pjesë dhe mbështesin këtë protestë paqësore, duke ngritur shqetësime që lidhen kryesisht me keqqeverisjen, abuzimin me pushtetin, mungesën e transparencës në projekte të caktuara, korrupsionin, apo mungesën e shërbimeve ndaj qytetarëve.

Ndër të tjera, qytetarët kanë paraqitur disa kërkesa që kërkojnë adresim të menjëhershëm, sepse janë të bazuara. Konkretisht, qytetarët kanë paraqitur 5 kërkesa, që përfshijnë:

1. Dorëheqjen e Qeverisë;
2. Shfuqizimin e statusit dhe kuadrit ligjor për investimet strategjike;
3. Shfuqizimin e kuadrit ligjor për Paketën e Maleve;
4. Anulimin e ndryshimeve në ligjin për zonat e mbrojtura;
5. Anulimin e ndryshimeve në ligjin për trashëgiminë kulturore shqiptare.

Është evident fakti që zëri i qytetarëve është dëgjuar nga institucionet europiane, ku së fundmi në seancën plenare të Parlamentit European tw datws 16 Qershor, shumë eurodeputetë kanë diskutuar mbi zhvillimet në Shqipëri nisur nga protesta masive e qytetarëve.

Vetë Parlamenti European, në datën 17 Qershor 2026, ka miratuar Rezolutën P10\_TA(2026)0217 “Mbi raportin e Komisionit European për Shqipërinë për vitin 2025”, ku ndwr tw tjera, parashikohet se Parlamenti European:

47. *Shpreh keqardhje të thellë për faktin se Ligji i Shqipërisë për Investimet Strategjike i vitit 2015 është zgjatuar, duke pasur parasysh se dispozitat e tij mundësojnë procedura të përsheptuara të dhënies së lejeve dhe reduktim të kontrollit mjedisor, gjë që rrezikon të ketë ndikime negative mbi zonat e mbrojtura dhe zona të tjera me ndjeshmëri të lartë mjedisore. Kërkon shfuqizimin e ndryshimeve të vitit 2024 në Ligjin për Zonat e Mbrojtura, të cilat lejojnë zhvillimin e infrastrukturës turistike në shkallë të gjerë brenda zonave të mbrojtura dhe transferojnë kompetenca kyçe të qeverisjes dhe vendimmarrjes te Këshilli Kombëtar i Territorit, duke dobësuar kështu mbikëqyrjen mjedisore.*

48. *Thekson se Komisioni Evropian e ka paralajmëruar Shqipërinë kundër veprimeve që mund të ndikojnë negativisht në rrugën e saj drejt anëtarësimit në Bashkimin Evropian, në kushtet e protestave të vazhdueshme kombëtare lidhur me një projekt zhvillimi luksoz në shkallë të gjerë, i cili kërcënon një zonë të mbrojtur natyrore ku jetojnë flamingot, fokat dhe ku ndodhen vende folezimi të breshkave. Mbështet kritikën e Komisionit në këtë drejtim dhe kujton se përafrimi me legjislacionin mjedisor të Bashkimit Evropian, përfshirë Direktivën për Shpendët dhe Direktivën për Habitatet, është një kusht paraprak për anëtarësimin në BE.*
49. *Shpreh shqetësim serioz se zhvillimet në vazhdim brenda zonës së mbrojtur Vjosë–Nartë tregojnë pasojat konkrete të këtyre ndryshimeve ligjore dhe rreziqet që ato sjellin për zonat me vlera të njohura ekologjike. Ndjek nga afër protestat masive dhe paqësore që po zhvillohen në këtë kuadër. I bën thirrje autoriteteve shqiptare që të vendosin menjëherë një moratorium për të gjitha procedurat e reja të lejeve, punimet ndërtimore dhe ndërhyrjet zhvillimore brenda zonave të mbrojtura, derisa dispozitat e papajtueshme të Ligjit të ndryshuar për Zonat e Mbrojtura të jenë shfuqizuar, në përputhje me kërkesat e kahershme të Komisionit dhe Parlamentit Evropian dhe në linjë me standardet përmbyllëse të Kapitullit 27, si dhe derisa të garantohet përputhshmëria e plotë me standardet e Bashkimit Evropian për mbrojtjen e natyrës. Nënvizon se çdo projekt në këtë zonë duhet t'i nënshtrohet vlerësimeve të plota të ndikimit në mjedis, në përputhje të plotë me standardet e BE-së, duke përfshirë një proces transparent konsultimi publik me komunitetet lokale, shkencëtarët dhe shoqërinë civile.*

Është e paarsyeshme dhe jashtë çdo logjike normale parlamentare, që shqetësimet e qytetarëve shqiptarë të jenë objekt diskutimi në Parlamentin Evropian, ndërkohë që Kuvendi i Shqipërisë nuk debaton dhe dëgjon zërin e qytetarëve që përfaqëson.

Për këtë arsye, në mbështetje të nenit 98 të Rregullores së Kuvendit, ku parashikohet se “një kryetar grupi parlamentar mund të paraqes një mocion me debat për çështje të vecantë”, kërkojmë zhvillimin e një debati mbi kërkesat e qytetarëve, të cilat kanë gjetur mbështetje edhe nga pikat e sipërcituarra të Rezolutës së Parlamentit Evropian, me qëllim vlerësimin sesi dhe në çfarë forme këto shqetësime duhet të adresohen. Koha e përgjithshme e debatit të jetë jo më shumë se 10 minuta për secilin deputet që dëshiron të diskutojë.

Përsa më lart, kërkojmë mbledhje e Konferencës së Kryetarëve në datën 23 Qershor 2026 dhe përfshirjen e kësaj çështje në rendin e ditës të seancës plenare të datës 25 Qershor 2026, nisur nga fakti që në Kalendarin e Punimeve të Kuvendit nuk është parashikuar shqyrtimi i çështjeve të tjera në këtë datë dhe Kuvendi nuk ka asnjë arsye për të marrë pushime, ndërkohë që qytetarët janë në rrugë duke protestuar.

Duke ju falenderuar për mirëkuptimin,

## GRUPI PARLAMENTAR I PARTISË DEMOKRATIKE

Gazment BARDHI



KRYETAR